

23. oktober 1998

UKA 1998/55

UKA 1998/82

UKA 1998/83

pillugu

Inatsisartut Inatsiseqarnermut ataatsimiititaanit

ISUMALIUTISSIISUT

(UKA 1998/55)

Pisortat ingerlatsineranni suliassat suliarineqartarnerat pillugu Inatsisartut inatsisaata allangortinneqarneranik Inatsisartut inatsisissaattut siunnersuut.

Siunnersuutip aappassaaneerlugu suliarineqarnissaanut tunniunneqartoq

(UKA 1998/82)

Pisortat ingerlatsineranni suliassat suliarineqartarnerat pillugu Inatsisartut inatsisaanni § 7a-p suliffeqarfinnut Namminersornerullutik Oqartussanit pigineqartunut atortuulersinneqarnissaanik Inatsisartut aalajangernissaannut siunnersuut.

Suliarineqarnerata nanginneqarnera.

(UKA 1998/83)

Suliffeqarfinni Namminersornerullutik Oqartussanit pigineqartuni oqaatsitigut sullinneqarneq pillugu Inatsisartut inatsisissaattut siunnersuummik saqummiussisoqarnissaanik Inatsisartut aalajangiinissaannut siunnersuut.

Suliarineqarnerata nanginneqarnera.

Suliamik sularininnermi Inatsisartut Inatsiseqarnermut ataatsimiititaanit peqataapput

inatsisartuni ilaasortaq Otto Steenholdt (A), siulittaasoq
inatsisartuni ilaasortaq Anders Nilsson (A)
inatsisartuni ilaasortaq Niels MītāK (S)
inatsisartuni ilaasortaq Johan Lund Olsen (IA)

Inatsisartut Inatsiseqarnermut ataatsimiititaata Inatsisartut siullermeerinnereeranni Inuit Ataqtigiinnit siunnersuutit pingasut oqaaseqaatitaat ilanngullugit misissuataarpai. Ataatsimiititap suliamik sularinninnerani KANUKOKA, tamatuminnga qinnuigineqarnermi kingorna suliassat sularineqartarnerat pillugu inatsimmut allannguutissatut siunnersuummut saqqummiunneqartumut tunngatillugu isummersuutiminik saqqummiussinissaminut aggersarneqarpoq, kiisalu suliassat sularineqartarnerat pillugu inatsisip 1994-imi atortuulersinneqarnerata kingorna kommunit ingerlatsinerannut ataatsimut isigalugu qanoq sunniteqarsimanersoq Kattuffik nalileeqquneqarpoq. Tamatuma kingorna Kanukokap inassuteqaatai ataatsimiititap aalajangiinermini ilanngullugit tunngavigai.

Inatsiseqarnermut ataatsimiititap erseqqissassavaa suliassat sularineqartarnerat pillugu inatsimmut allannguutissatut siunnersuutit saqqummiunneqartut KANUKOKA-mit akerlerlilerneqanngimmata.

Ataatsimiititap isumaqtigiittup naapertuuttutut isigaa innuttaasut oqaatsitigut pisortanit oqartussaasunit sullinneqarneranni pisinnaatitaaffiisa suliassat sularineqartarnerat pillugu inatsimmi ilanngunneqarnissaat, taamaalilluni taamatut inatsisitigut pisinnaatitaaffeqarneq ersarissumik paatsuugassanngitsumillu allassimalissaaq.

Inatsiseqarnermut ataatsimiititap tassunga atatillugu, KANUKOKA-llu kaammattuineratigut Naalakkersuisut kaammattorpai suleqatigiissitamik, pisortat oqartussaasut ulluinnarni sullissinerannut sanilliullugu sulianik sularinnittarnermut inatsisip qanoq tulluartigineranik naliliisussamik, pilersitseqqullugit. Inatsimmi aalajangersakkat iluamik malitsinneqarnissaannut aporfissaqartoq paasineqarpat suleqatigiissitaq aaqqiissutissanik siunnersuusiortariaqarpoq.

Taama oqaaseqarluni ataatsimiititaq inassuteqarpoq Pisortat ingerlatsineranni suliassat sularineqartarnerat pillugu Inatsisartut inatsisaata allanngortinneqarneranik Inatsisartut inatsisissaattut siunnersuut maannakkutut iluseqarluni aappassaaneerlugu sularineqassasoq.

Pisortat ingerlatsineranni suliassat sularineqartarnerat pillugu Inatsisartut inatsisaanni § 7a-p suliffeqarfinnut Namminersornerullutik Oqartussanit pigineqartunut atortuulersinneqarnissaanik Inatsisartut aalajangiinissaannut siunnersuut saqqummiunneqartoq aammalu Suliffeqarfinni Namminersornerullutik Oqartussanit pigineqartuni oqaatsitigut sullinneqarneq pillugu Inatsisartut aalajangiinissaannut siunnersuut saqqummiunneqartoq ataatsimiititap isumaqtigiittup ilanngullugit isumaqtigai.

Ataatsimiititaq isumaqarluinnarpoq pissusissamisoortuusooq piginneqatigiiffiit Nammiinersornerullutik Oqartussanit pigineqartut oqaatsit atorluarneqarsinnaanerusut aallaavigalugit sullissippata.

Taamaattorli ataatsimiititaq isumaqarpoq suliffeqarfiit namminersornerullutik oqartussanit pigineqarnerat tunngavigalugu immikkut ittumik

piumasaqaateqarfigineqarsinnaassasut, minnerunngitsumik oqaatsitigut sullinneqarneq eqqarsaatigalugu.

Aalajangiinissamik siunnersuutit taakku marluk Inatsisartunit akuersissutigineqarnerisigut innuttaasut piginneqatigiiffinnut namminersorerullutik oqartussanit pigineqartunut attaveqarnerminni oqaatsit pineqartut arlaat atornissaat piunasaqaateqarsinnaanerit inatsisit tunngavigalugit pisinnaanngussaaq.

Taamatut oqaaseqarluni Inatsisartut Inatsiseqarnermut ataatsimiititaata Pisortat ingerlatsineranni suliassat suliarineqartarnerat pillugu Inatsisartut inatsisaanni § 7a-p suliffeqarfinnut Namminersorerullutik Oqartussanit pigineqartunut atortuulersinneqarnissaanik Inatsisartut aalajangiinissaannut siunnersuutip aammalu Suliffeqarfinni Namminersorerullutik Oqartussanit pigineqartuni oqaatsitigut sullinneqarneq pillugu Inatsisartut inatsisissaattut siunnersuummik saqqummiisoqarnissaanik Inatsisartut aalajangiinissaannut siunnersuutip Inatsisartunit siullermeerlugit suliarineqarnerisa nanginneqarnissaat inassutigaa.

Otto Steenholdt (A)
ataatsimiititami
siulittaasoq

Anders Nilsson (A)

Niels MatāK (S)

Johan Lund Olsen (IA)